

# Bezizlazna situacija u Mostaru je neprihvatljiva

“Jasno je da lokalni organi vlasti u Mostaru nisu preuzeli političku odgovornost”, izjavio je danas visoki predstavnik Christian Schwarz-Schilling. “Proces ujedinjenja Mostara postao je talac političkih stranaka i pojedinih političara, koje više zanimaju ambicije vezane za njihovu kampanju nego interesi samog grada,” dodao je visoki predstavnik. “To se ne može tolerisati”.

Kao odgovor na trenutnu bezizlaznu situaciju u kojoj se Mostar nalazi, visoki predstavnik je sazvao hitni sastanak sa predsjednicima lokalnih odbora stranaka zastupljenih u Gradskom vijeću, šefove klubova tih stranaka, gradonačelnika i predsjednika Gradskog vijeća, koji će biti održan 25. maja u Sarajevu. Visoki predstavnik je rekao da će od relevantnih organa vlasti “zahtijevati konkretne rezultate” u sljedećih nekoliko sedmica.

Mostar je jedina velika opština u BiH koja nije usvojila budžet za 2006. godinu. Istovremeno, sistematizacija gradske uprave daleko je od okončanja, što onemogućava imenovanja ljudi u državnu službu. Također, nije usvojen program rješavanja pitanja tehnološkog viška, što predstavlja nepotrební trošak za poreske obveznike. Jedinstvena ustanova za urbanizam još uvijek nije formirana. Status HTV-a nije riješen, niti su organi vlasti pokazali da imaju jasnu viziju o kulturnim institucijama grada. Kako izgleda, još uvijek nije nađeno rješenje ni za otpad koji se gomila po ulicama.

“Lokalni organi vlasti moraju preuzeti odgovornost za provođenje procesa ujedinjenja do kraja”, rekao je visoki predstavnik. “Činjenica da to još uvijek nisu uradili rezultirala je ovom nemogućom situacijom a građani Mostara

moraju snositi posljedice toga”.

Cilj sastanka zakazanog za 25. maj biće da se nađu rješenja za najvažnija pitanja sa kojima se Mostar suočava. Visoki predstavnik će apelovati na političke stranke da daju konstruktivne prijedloge i iznađu rješenja za gradske probleme prije sredine juna, odnosno prije nego visoki predstavnik podnese izvještaj o trenutnoj situaciji u Mostaru Vijeću za implementaciju mira.